

Halltõõzz e'tkkõs luõss-šeellmõõžž keälldmõõžžâst Teänjooggâst u'vddeš ee'ttik-kâdda

Halltõõzz e'tkkõs luõsskue'llšeellmõõžž keälldmõõžžâst Teänjooggâst 2022 u'vddeš ee'ttik-kâdda riikksuâvtõõzz sâbbrest neljdpei'vven 21.4.2022. E'tkkõõzz meâldlânji luõzz ij vuäžžči šee'lled ni voo'ps Teänjooggâst le'be tøn čârrčaa'zzin joo'tti ee'kken.

Mäinnan viõkksaž keälldmõ'sše lij Teän luõssnaa'li samai viõkksaž huänn'nummuš ee'jjest 2018 ää'ljee'l. A'rvvõõzzi mie'ldd juõ'kknallšem luõss-šeellmõš le'čči lei'gğkue'llšeellmõš tän poodd. Miârast ma'cci luõssmie'rr lij nu't vue'llgaž, što keäll'jemtäâvtõõzz jiâ tiuddu, hâ't-i kue'llšeellmõš ij le'čči ni voo'ps. Lââ'ssen oudldõs ärvvsai šõõrbi, määng ee'jj miârast šõddâm mei'nluõzzi meärra lij samai hue'nn.

Še Teänjoogg čârrjooggi luõssnaa'li sâä'jj lij mädd- da meä'cctäällministeria a'rvvõõzzi mie'ldd samai hue'nn. Luõssnaa'li sâä'jj lij huänn'nam miârkteeinalla Teänjoogg čârrjooggin ee'jj 2017 kuõskki ää'lmõs vuõiggâž ärvvtõõllâm vuõiggâdvoõttšõddmõõžž mâñña. Uccjoogg luõssnääl'ij jee'res čârrjooggi nalla teänab tiud keäll'jemvuõtt-täâvtõõzzid.

Gu Teänjokk lij Taarr da Lää'dd kõskksaž raajj-jokk, a'lğge luõss-šeellmõõžž kuõskki rä'tkkõõzz tuejjeed õõutsââ'jest Taarrin. Ää'sšest lij kičõlõttum sagstõõllâd rä'tkkummuž samai vää'nes luõzz kue'llše'llemvuei'tlvažvuõđâst, ko'st kue'llšeellmõš le'čči soovšum rajjuum peei'vin ä'rbvuõđlaž šee'llemneävvin. Tä'st jeät kuuitâg vuäžžam puäđõõzz, gu vaajtõsmäain jiâ oçndõõttâm čõõdviikkmõõžž ää'ntee'jen. Puârast räâ'jtum luõzz kue'llše'llemvuei'tlvažvuõđ juâkkmõš määng kue'llše'llemjou'kke da kue'llše'llemnâlla lij vaiggâd viikkâd čõõđ vue'jjest. E'tkkõõzz näkam kue'llše'llemvuei'tlvažvuõđâst jiâ vuäžžam tuärjjõõzz jiâ kuuitâg ä'rbvuõđlaž, sä'mmli'žže kue'llše'llemkulttuu're kuulli zääbbarsii'li õõ'nn'jin, pääiklaž kue'llše'llemvuõiggâdvoõđ vuä'mstee'jin. Puârast räâ'jtum kue'llše'llemvuei'tlvažvuõđ va'žžtõssân lij še tõt, što kue'llše'llemetäddas de'be ti'll'lâäv puârast viõkksânji soovšum vuu'did, mi lââ'zzat riisk pääiklaž luõssnaa'li vuâkka õõudâs huänn'nummša.

Va'žžteei vue'jjest jee'res kue'llšlaaji šee'llemvuei'tlvažvuõđid haa'leet lââ'zzted, nu't-ba Teänjooggâst vuäitt šee'lled puõ'tti keässa jee'res kuõ'lid gu luõzz siõmmna soovšum meärrõõzzin gu mõõnni ee'jj. Jee'res gu luõzz kie'ssvuäggamneävvin šeellmõš võnnsest lij miârktõs soovšed päi'kk-kâ'ddloo'vin, määtklai suä'vvel-loo'vin vuäžž ää'nned takai keä'ppsõs kuudaklaass pozvuvuäggamšee'llemneäv da jee'res säi'mmkue'llše'llem-meärrõõzzid muu'tet soovšumnallše'mmen loppkie'zzest. Miârkteei lij še kuu'ž kue'llšeellmõõžž soovšummuš jee'res šlaaji gu luõss-šeellmõõžž kuõskki meärrõõzzin. Täâvtõssân lij ooudâsviikkâd määngpeällsaž kue'llšeellmõõžž Teänjoogg čäccõõzzâst da lââ'zzted še jee'res gu luõzz miârktõõzz porrmõškue'llen da turismmkue'llšeellmõõžž täâvtõssân.

Teänjoogg luõssnääl'jäll'jummsen lij vääžnai še tuejjeed tu'tkkummuž Teänjo'kke piâssâm jâkkšlaajest, šmä'gğluõžžâst. Luâttree'gğesvuõttkõõskõõzz puõ'tti kie'zz ha'ñkkõõžžâst se'lvtet õõutâst Teänkuânñaz kue'llšii'll'jin smä'gğluõžž kuârren šeellmõ'sše suävlaž da luõ'sse hääi't'te'mes šee'llem-mõõntõõllmõõžžid da naa'lid. Lââ'ssen Luâttree'gğesvuõttkõõskõs nâarr teäđ smä'gğluõžž âalgai jie'llemnääl'est ää'n, gu mõõnni ee'jj kooddmest šõddâm âalga liâ alte'tmen miârrijäättmõõžžâs. Lââ'ssteätt lij tarbbsõs, gu tä'st jie'llempââ'jest liâ samai vää'neld teäđ Tä'vv-Atlaant vuu'dest.

Lââ'ssteäđ mädd- da meä'cctäällministeriast:

Vesa Ruusila, luâttskäätrdemptäällduumšek, te'l. 02951 62051, vesa.ruusila(at)gov.fi
Tapio Hakaste, sagstõõlli ve'rgğooumaž, te'l. 02951 62152, tapio.hakaste(at)gov.fi